



UNIVERSITÄTS-
BIBLIOTHEK
PADERBORN

**DN. DVRANDI|| à Sancto Portiano, in Senten=||tias
Theologicas Petri Lombardi|| Commentariorum libri||
quatuor.||**

Durandus <de Sancto Porciano>

Antverpiæ, 1567

Quæstio quinta. Vtrum conueniens fuerit Christum tertia die resurgere.

[urn:nbn:de:hbz:466:1-72607](https://nbn-resolving.org/urn:nbn:de:hbz:466:1-72607)

7 DE PATRIBVS autem qui erant in limbo, patet q̄ fuerunt liberati per Christum, quia tales nulli potē erant obnoxii, nisi soli p̄nāe damni debita peccato totius naturæ. Sed hoc debuit directē per passionem Christi solum est, igitur per passionem Christi tales fuerunt penitus liberati.

8 AD Primum argumentum dicendum quod ascensio congruit Christo ratione sui, & ideo quia ipse est altissimus super omnes ascendere debuit, sed descendere non competit ei nisi pro nobis. Et ideo tantum descendit quantum nostræ liberationi expediebat & non sub omnibus simpliciter.

9 Ad secundū dicendū q̄ limbus patrū dicitur infernus inferior nō simpliciter, sed respectu huius habitationis, de quo anima David vel etiam Christi deducta fuit. Et ille locus potest dici profundissimum inferni comparatiuē ut profundum sit respectu cæli aēr caliginosus in quo sūt dæmones, profundus locus nostræ habitatiōis, prout dicitur sicut limbus patrū, de qua Iob liberatus fuit.

QVÆSTIO QVINTA.

An cōueniens fuerit Christum tertia die resurgere.

Tho. 3. q. 53. ar. 2. & q. 51. ar. 4.

SECUNDO principaliter quæritur de resurrectione Christi, circa quam quærentur duo. Primum est an cōueniens fuerit Christum tertia die resurgere. Secundum est an debuerit resurrectionem suam per argumēta probare. Ad primum sic procedit. Et videtur quod non fuerit cōueniens Christum tertia die resurgere, quia separatio animæ Christi à corpore per mortem fuit solum facta propter nostram redemptionem, sed redemptio nostra in instanti mortis Christi completa est, ergo statim debuit anima Christi suo corpori reuiri.

2 Item membra debent capiti conformari & caput membris, sed nos qui sumus membra, non resurgimus tertia die, sed differunt resurrectione nostra vsq; in finem mundi, ergo videtur quod resurrectio Christi qui est caput nostrum tantumdem differri debuerit.

3 Itē Dominus dicit Mat. 12. sicut fuit Ionas in ventre ceti tribus diebus & tribus noctibus, sic erit filius hominis in corde terræ. Sed si corpus Christi fuit in corde terræ cum nō fuerit ibi nisi mortuum non potuit resurgere tertia die, sed quarta vel quinta, quare &c.

4 IN CONTRARIUM est quod dicitur in symbolo, resurrexit tertia die secundum scripturas. Et Mat. 20. Tradent eum gentibus ad illudendum, flagellandum, & crucifigendum, & tertia die resurget.

RESPONSIO. Dicenda sunt duo. Primum est q̄ cōueniens fuit Christum à morte resurgere. Secundū est quod cōueniens fuit ipsum tertia die resurgere.

6 Cōuenientia primi patet propter quatuor. Primo propter naturæ assumptæ perfectionem, quia naturæ debebatur omnis perfectio quam possibile est in natura reperiri. Sed prima perfectio naturæ humanæ consurgit ex vnione suarum partium quæ etiam non habent totalem perfectionē cum sint ab inuicem separate, ergo hæc perfectio debuit esse semper in natura assumpta nisi quædam oportuit eā solui propter necessitatē nostræ redemptionis propter quā ipsa natura assumpta fuit. Secundo propter fidei nostræ confirmationem maximē quantum ad deitatem Christi humanitas enim clarē patuit in morte, sed deitas latuit propter quod decuit q̄ virtus deitatis in resurrectione pateret, vnde. 2. Cor. 8. dicitur & si crucifixus est ex infirmitate, sed viuuit ex virtute Dei. Tertio propter spei nostræ subleuationē. Quia dum videmus Christum qui est caput nostrū resurrexisse, speramus & nos resurretuos cum simus eius membra, vnde. 1. Cor. 15. dicitur: Si Christus prædicatur q̄ resurrexit à mortuis, quomodo quidā dicunt in nobis q̄ resurrectio mortuorū nō est? Quarto propter cōplementū nostræ salutis, quia sicut mala sustinuit moriendo vt nos liberaret à malis, ita glorificatus est resurgēdo vt nos prouocaret ad bona secundum illud Ro. 14. traditus est propter debita nostra, & resurrexit propter iustificationem nostram, & sic patet primum.

7 Quantum ad secundum patet, quod cōueniens fuit Christum tertia die resurgere, quia sicut dictum est resurrectio Christi manifestauit eius deitatem sicut mors

humanitatem, ergo decuit vt Christus tantum morte detineretur quantum sufficiebat ad declarandum eum fuisse verē mortuum, propter quod oportuit aliquam moram esse inter mortem & resurrectionem. Si enim statim post mortem resurrexisset, potuisset videri q̄ non fuisse verē mortuus, & per consequens non verē resurrexisset. Ad veritatem autem mortis manifestandam sufficiebat q̄ vsq; ad tertiā diem eius resurrectio differretur, quia non contingit quin infra hoc tempus in homine qui videtur mortuus & non est, appareant aliqua signa vitæ, sic dicitur de illis qui laborant apoplexia, quare cōueniens fuit Christum tertia die resurgere.

8 Ad primum argumentum dicendum quod non solum oportebat ad salutem nostram q̄ redemptio nostra fieret per mortem Christi, sed quod fides mortis eius confirmaretur in nobis, quod non fuisse factū si immediatē post mortem resurrexisset, quia potuisset credi quod non fuisse verē mortuus.

9 Ad secundum dicendum quod caput & membra cōformantur in natura, sed non in virtute, Excellentior enim est virtus capitis quam membrorum. Et ideo ad demonstrandum excellentiā virtutis Christi cōgruum fuit Christum tertia die resurgere aliorum resurrectione dilata vsq; ad finem mundi.

10 Ad tertium dicendum q̄ Christus dicitur fuisse tribus diebus & tribus noctibus in corde terræ per synecdochē, hoc est accipiendo partem pro toto, quia sepultus fuit feria. vi. in fero quæ pars computatur pro toto die, & in sepulchro mansit per totū sabbatū, hoc est per diem integrum, & per noctem diei dominicæ quæ pars similiter accipitur pro toto die naturali, & in diluculo diei dominicæ surrexit. Quocūq; autē modo accipiat dies, siue pro die naturali qui cōtinet spaciū. 24. horarū, siue pro die artificiali qui est latitudo solis super terrā semper Christus dicitur tertia die resurrexisse. Quod patet de die naturali, quia sicut primi dies propter primi hominis lapsum cōputatur à luce in noctē, ita isti dies propter hominis reparationē cōputatur à tenebris ad lucē, ita vt prima pars diei naturalis sit tenebra vel nox. Secūda verō lux. Christus autē passus est in fine feriæ. 6. & hoc circa nonā, & sic habemus primā diē, & fuit in sepulchro per totū sabbatū, ecce secūda dies, & resurrexit in diluculo dominicæ, ecce q̄ in tertia die resurrexit, idem est accipiendo diem artificialem. Quia diluculum diei dominicæ est principium tertii diei artificialis, vt de se patet.

QVÆSTIO SEXTA.

Vtrum Christum debuerit probare resurrectionem suam per argumēta.

Tho. 3. q. 55. ar. 5. & 6.

AD tertium sic proceditur. Et videtur q̄ Christus nō debuerit probare resurrectionem suam per argumēta. Quia illa argumēta quæ induxit aut fuerunt sufficientia ad probandum resurrectionem aut non, si non frustra adducta fuerunt. Si sic cum argumētū sufficiens facit scientiam vel agnitionem quæ non sicut simul cum fide, vel saltem euacuant meritum fidei, dicente Greg. in homiliis q̄ fides non habet meritū cui humana ratio prebet experimentū, videtur q̄ illa argumēta euacuauerint meritum fidei, quod est inconueniens.

2 Item quicquid Christus ostendit discipulis ad manifestationē suę resurrectionis hoc possunt ostendere angelis corpora assumptas, & in eis hominibus apparentes, p̄ā angeli in humana effigie frequenter se hominibus ostēderunt & cum eis loquebantur, & comedebant ac si essent homines veri, vt patet Gen. 18. de angelis qui apparuerunt Abraham, & tamen angeli nō habent vera corpora humana sibi vnita quod requiritur ad veram resurrectionem, ergo videtur quod signa quæ Christus exhibuit discipulis non fuerunt cōuenientia ad probandum resurrectionem.

3 Itē sicut resurrectio est articulus fidei, ita passio & ascensio & multa alia quæ pertinet ad diuinitatem Christi, sed illa non fuerunt probata per aliqua argumēta, ergo nec resurrectio debuit probari.

4 IN Contrarium est quod dicitur Act. 1. Præbuit seipsum viuum post passionem suam in multis argumētis.